

بِسْمِ اللَّهِ الرَّحْمَنِ الرَّحِيمِ



SII SA HADAPAN O MANGA INSAN A LANKAP SA DONIYA

al Hamdulillāh! So langowan o bantogan na rk o Allāh a Kadnan a Makalimoon a Masalinggagawn. So kapakaslang na bagian o Nabī tano a Mohammad a go so manga pamilya niyan a go so manga sahābat iyan sa kalangolangon iran. Aya oriyen iyan na:

Phakitadman akn ko langowan a Insan sii sa doniya anka'i a katharo' o Allāh, ka so kapananadm na phakanggay a gona ko miamaratiaya:

Pitharo' o Allāh ko sūrah as Saff a:

يَا أَيُّهَا الَّذِينَ ءَامَنُوا لِمَ تَقُولُونَ مَا لَا تَفْعَلُونَ ﴿١﴾ كَبُرَ مَقْتًا عِنْدَ اللَّهِ أَنْ تَقُولُوا مَا لَا تَفْعَلُونَ ﴿٢﴾

Hay so miamaratiya ino kano gii tharo' sa nganin a di niyo bo' panggalbkn. Miakalala' a rarangit a matatago' ko Allāh (a mapmbagi'an iyo) ko gii niyo katharo' sa nganin a di niyo bo' pnggalbkn.

Anda so Insan a ithoman iyan so pitharo' iyan a go pnggalbkn iyan so pitharo' iyan?!

Pitharo' o Insan a pagompiyaan iyan a ginawa niyan sa ipagayon iyan ko Islam.

Pitharo' o Insan a mbalowin iyan a ginawa niyan a ladiawan a rawatn.

Pitharo' o Insan a pnggalbkn iyan so kamapiyaan iyan a go so pamilya niyan.

Pitharo' o Insan a pnggalbk sa sa dn sa magaga niyan ko kapakaozor o Ompongan iyan.

Pitharo' o Insan a phakatindgn iyan so self-reliance a pantag ko Ompongan iyan.

Pitharo' o Insan a pagmbaal sa pamilya a mapiya a ladiawan.

Pitharo' o Insan a ipnggolalan iyan so Bay'ah a pizapaan iyan ko kiabaloy niyan a Insan.

Pitharo' o Insan a pnggalbkn iyan so kapakala' o sabot iyan ko Islam.

Pitharo' o Insan a thndo' sa Amir iyan a pagonotan iyan so Pando'an iyan.

Pitharo' o Insan a thimoon iran so manga zakat iran sa pthandingann o Insan.

HAY MANGA INSAN!

Ino minitoman tano ankanan a manga pitharo' tano a go mianggalbk tano sa piakathaman tano so gaga tano ron?

Oman i isa na smbaga niyan a ginawa niyan.

TAMAN IMANTO

Na da dn mapasad so kapzalosawa ko Paraatoran a Insan a Inisorat o Murshid ka da' a pnggalbk on, antaa i khaizaan san?

Ya Allāh zaksi' inka a pinggalbk akn so miagaga ko ron sa di ako nka pagpda ko manga taw a so pitharo' iran na da iran nggalbka sa lpas ako nka ko siksa' aka a malipds.

Taman imanto, na so kalaan ko manga Insan na manga llmk a di ran pnggalbk so khagaga iran sa pantag sa kapakabagr o Ompongan iran.

Taman imanto, na aya bo' a malalamba' ko Insan na so ngaran iyan. Da' a ba niyan galbk a maggdam o pagtaw a Muslim sa Pilimpinas a makaliyoliyo ko galbk o Murshid ko kapphanorat iyan sa manga kitab a go Khutbah a pphakalankapn ko sabaad a manga masjid sa Mindanao. Mada' anan na da' a khailay a go khagdam a sakodo o Ompongan ko pagtaw niyan. Aya bo' a somasakodo sankanan a galbk ko agama na so manga Insan sa Qatar a go so manga Insan sa Jeddah, sa pzaksi'an o Allāh a go mbalasan iyan kiran sa mapiya so amal iran a soaso'at iran ko Allāh.

Apiya so Summer Remedial Class a gii nggalbk o manga Insan sa MSU-District na mimbaloy imanto a okit ko kasagomparak o manga Insan sabap ko kaada o mapiya a Parangay o manga Insan a komakapt on, sabap dn ko pirak a maito' a pkhasokat on na kiasabapan ko kiapakala' i lalag o sabagi' sa kabaya' sa kanggona.

Miakaadn so manga Insan sa Marawi sa Islamic Forum a kiadarpaan o manga ala a ulama a manga doctor ko agama, sa diarpaan o manga Muslim mama babay dn sa inisangi' anan ko manga kalilimod a Islam ka mamantk so manga pakaiza' o manga taw sa pphanmbagn sa mamantk o manga ulama, na mapiya nan a okit a kiababayaana o manga Muslim na o di limo' so Allāh na di dn oto kappharomanan ka da' a mapnggasto ron a tamok, ka tanto dn a mianganogon so manga Insan a adn a pirak iyan a khiogop iyan.

Hay manga Insan, Ibt ko Allāh ka so salad a pirak iyo a margn a kakhaboka'i niyo ron, na khaoma so masa a so balas iyan na di ron miphamasa so doniya ko kala' iyan i gona ko taw a ipliligto' iyan imanto.

Hay manga Insan, tatadmi niyo a da dn a datar o Insan a Ompongan sa Pilimpinas a madakl a pzokayan on a gomagalbk ko manga pangadapan sa sold a go sa liyo a Pilimpinas, ogaid na so Insan na da' a lawan iyan a kadodoanan a Ompongan ko kasaromag iyan ko kanggalbk ko agama a go so kaphagompiya'i ko btad o manga Muslim sabap sa kapliligto' i niyan sa ginawa niyan.

So Insan na da' a khitoro' iyan a pagandapan iyan (office) a ron pkhasongowi so Olowan iyan sank'a i miaka 34 ragon, na tanda' anan ko kaligt o manga taw niyan a da iran

maapas o ba adn a mapakatindg iyan a Pangadapan iyan na antonaa i kakhabthowi ron sa Ompongan a da' a thontokan sa ganot iyan ka da' a darpa' iyan ko liyawaw o lopa'.

O bnar a so Insan na pnggalbk ko agama sa tolabos a soaso'at ko Allāh na di niyan nanayawa i kapakasabota on o Ompongan iyan sa skaniyan dn i nggalbk sa kapakaogop iyan ka so imbgay niyan a tamok a pnggaston iyan na rk iyan so balas iyan sa da' a phakakowa on a isa bo'. Di pipikira o Insan i kagiya adn a pkhitabang iyan a maito' a pirak ko gii kanggalbk o Murshid na ba aya bo' a pkhaompiyaan on na so Murshid iyan ka so sambi' iyan a balas a mala' na rk iyan a imbgay ron o Allāh. So kapkhowa sa daawa o Insan sa ino di pnggalbk odi' na di magogop sa pirak ka kagiya da' a ibbtad a plano o Ompongan, na giyanan na daawa o taw a di pnggalbk a pphloba sa sankot ka o bnar a paparatiayaan iyan so balas o Allāh na da' a makarn on a nganin ko kapnggalbk iyan sabap sa skaniyan i phakalaba kna' o ba so salakaw ron.

Gowani a somagad so Coco na adn a manga Insan - minsan pn inilalang akn oto a haram a galbk na da iran onoti so pando'an akn - sa aya dn miosa'i ko langowan a tamok iyan sa initgl iyan so kimbgan iyan on ka kagiya makaiinam sa laba, na miakowa niyan mambo' so laba niyan sa datar o katawi tano ron imanto!

Imanto, na ino di pnggimowat so Insan ka kagiya khabaya' sa laba a mala' na ino niyan di zoroga a tamok so galbk o Insan ko Islam, o bnar a khabaya' sa balas ino pn zasakataw a pkhatoon a maawid a akal ko manga Insan ko manga galbk ko agama ka karina sa di bnar so gii niyan tharoon a khabaya' sa balas ko Allāh.

Manga Insan, di niyo dn nanayawa i kaphakaoma rkano o manga plano o Ompongan a Insan, sa so khowa sa balas a go ithoman iyan so pizapaan iyan, na aya dn ploba sa okit a galbk a mitompok iyan ko Insan. Da' a pnayawan tano sa kapnggalbk o Insan ko kababaloy niyan a Ompongan ka da niyan imasada so Paraatoran iyan a ron khaaloy so manga galbk iyan ka apiya so Amīr iyan na da' a phamakin'g on a rowar ko maito' a lompokan ko manga Insan a sosorogn iran a tamok so galbk iyan, sa miailay a go kiazaksi'an o manga taw a go so Allāh a so galbk iyan na miakanggay a gona ko manga Muslim, a go mimbaloy a paninggalan so miangapapasad iyan a galbk.

Da' a khitoro' tano a kitab a inisorat sa basa Mranaw a pantag ko kapphangosiyati ko Muslim a inirampay so pandangan iyan sa 200. Na so manga Khutbah tano imanto a miapasad tano na inisampay sa dow a ka Volume a romarankom sa manga gatosan a manga bandingan iyan ko agama. Miapasad tano ndiorobasa so kitab a Hadīth a Bulūg al Marām a isa nan a mala' a kitab ko Islam a pinggalbk tano ko sold o miakanm olan, na adn a tomiogalin sa kitab a sagorompong a manga ulama ko sold o miakadowa ragon a sosomangn a mala' a pirak i Dr. Mahid Mutilan (ikalimo' o Allāh) na da mapasad sa taman sa miawafat skaniyan, ka margn oto a galbk. Na minggalbk tano na sabap ko limo' o Allāh na miakapasad tano, na ba anan di bantogan o Ompongan a Insan, na aya mala' a mbalasan san o Allāh na so manga Insan sa Qatar a go sa Jeddah ka siran i makasosorog rakn san a gasto. Giyanka'i a manga galbk tano ko agama na tatap ai a taman sa kagba' o doniya na gii kanggonaan o manga Muslim na da' a datar anan a mapiya ko manga sadka jariyah ka da a ikhada' iyan, so wata a salih na phatay na khapitol so balas iyan, so tamok a giikanggonaan na khagba sa magaan ogaid na so ilmo' na khatatap sa taman dn ko bankit.

Manga Insan, pamakot kano mogop ko masa a adn a sakataw a Insan a giinggalbk ko kamapiyaan o Ompongan ka sii ko oriyan o kapatay o Murshid iyo na ngganatan kano niyan na da' a masisigoro niyo a ulama a phakasambi' on a ba niyan kalawani so mianggalbk iyan ko kapphakalankapa ko ilmo' o Islam. Pangnin tano ko Allāh a sii ko oriyan o kidalong iyan na makaoma so manga ulama iyo a manga papasang a go manga tagalbk ko Islam a khasompatan iran so kiaphoonan a manga galbk o Murshid.

Manga Insan magaan dn na makapmblablag tano na oman i isa na pamakotn iyan so ginawa niyan sa maosar iyan so pinakamaito' ko tamok iyan sa miogop iyan ko kapphakalankapa ko ilmo' o Islam ko manga taw. Ba niyo phnayawa a aya kapagogop iyo ko galbk a mapiya na amay ka makaoma so masa a da' a ba on pnggalbk na so tamok iyo na di niyo ron khiogop ka miada' so mama a giimromasay ko ilmo' o Islam.

Aya mapiya a masa o Muslim na so masa a adn a sakataw ron a mama a da dn kaganapi sa torog ko gii niyan kanggalbk sa kapakalankap o ilmo' o Allāh ko manga taw, na pamakoti niyo anan a mapd kano ron. Na aya pinakamarata' a masa na so masa a da' a khatoon a sakataw a mama a pphromasay ko kapphakalankap o ilmo' o Allāh ko manga taw sa nggolalan sa kapanorat, ka di man khapalihara so ilmo' o di nggolalan sa kapanorat, na arapn tano ko Allāh a di tano san matago'. Kna' o ba tano khlima sa ba skitano bo' i giinggalbk ko agama, ka mataan a madakl so manga ulama a lomalalis ko Panolon o Islam ogaid na lalis bo' sowara a magaan a kaphagonot iyan sa sambr na pkhada', so pman so blangan o kapanorat a giyanan na mapitl a galbk na pithorak a somasangan san a skitano i bigan o Allāh ko bantogan ko kapnggalbka on.

Giyanka'i a sorat o Amir odi' na Murshid na kapamakataadm ai ko kalankapan a manga Insan, ka kalokalo na makaprarad kiran na matago' iran sa ginawa so kamapiyaan iran a nggolalan ko kababaloy ran a inampda' ko Insan, kna' o ba so kamapiyaan o Ompongan i ziyapn iran ka so kamapiyaan iran na aya kiran phakisiyap.

Wassalam,



Hassanor bin Maka Alapa
Amīr al Insan